

Empau in auter solver digl 1 d'uost

Viseta alla «Paterlada» culs da Flem

DAD AUGUSTIN BEELI / ANR

■ **A Flem vegn aunc discurriu bia romontsch. Scret vegn nuot pli, dapi 100 onns buca. Tschintschau denton bein. L'anr ha tedlau ils discuors digl 1 d'uost el café dalla posta.** Ier ei massa glieud separticipada als solvers da purs. 350 famiglias da purs han envidau a tala occurrenza, igl ei stau la 25avla gada dapi ch'ins ha lantschau quell'acziun da solidaritad e reclama per l'agricultura svizra. Ils paucs brunchs ch'ei stai a disposiziun en Surselva, ein stai frequentai bein. Aschia era quel dil Lerchihof a Scheia. *Conrad Lerchi* e sia famiglia, ensemen culs camerats dalla Societad da musica da Flem e la gruppa *Ils Saleps*, han beneventau e surviu tshiens persunas. Tuts che fuvan s'annunziar per reservar il plaz han ils organisaturs buca saviu prender. Il catsch ei lu era staus grond. Avon ils buffets culs deliziusas caussas han ins stuiu spiggar, truscha, musica, ramurem da vuschs, stuschem avon las tuargias e la carn secca, calira, colonnas. In contrast tier tut quei han ins constatou a Flem Vitg el Café Postplatz. Leu ha la Cuminonza romontscha da Flem (CRF) envidau alla Paterlada. Quella gada ha mo ina pintga gruppa dau suatientscha agl invit. Las duas empremas «Paterladas» havevan intimau la suprastonza da cuntinuar cun quella purschida.

Buca selamentar

Il plaid digl 1. d'uost sil bein puril a Scheia ha *Vinzens Casty* fatg. Igl ei stau la festivitad uffiziala dalla vischnaunca da Flem. La Paterlada romontscha el caffè dalla posta ei stada pli modesta. Leu ein tuts participonts stai oratur. Igl ei stau ina meisa rodonda surveseivla. Per la ti-



In brunch digl 1. d'uost empau nunusitau: Ils participonts dalla Paterlada han giu legher, ed els han tschintschau d'ideas, da temps vargai, da quei e da tschei.

FOTO A. BEELI

arza gada ha la Cuminonza romontscha da Flem vuliu porscher la caschun da tschintschiar mo romontsch en in liug public. Tgi che ha giu peda, ei vegniu, e quels ch'ei cumpari, han tschintschau da quei e da tschei. Els han paterlau, denton buca dau la bucca, ed era buca selamentau dil svilup linguistic a Flem. «Romontschiar Flem ei buca nossa finamira», ha *Hanspeter Meiler*, il president dalla CRF, accentuau. Tenor el eis ei da tener

quei ch'ins ha, e buca dapli. Ins sappi nunpusseivel midar la situaziun, eis el persuadius.

Ses consuprastonts ed ils presents ein dil medem meini. El vitg da Gian Fontana san paucs scriver romontsch. Denton: tschintschiar, paterlar, discuorer, conversar, gliez sa era la generaziun futuras. La CRF vul animar ch'els separticipeschan era a sentupadas. Tener quei ch'ei aunc da tener munta ch'ins stoppi animar las fa-

migliais giuvnas da tschintschiar romontsch. Talas duessien veser la CRF sco plattafuorma, sco forum da discussiun per tener alerts il romontsch a Flem. Dapi varga 100 onns setegn il lungatg oriund aunc a Flem. Malgrad ch'il liug ei uffizialmei germanisau, ei la burnida aunc buca sestizzata. Entuorn igl onn 1905 fuvan ils loghens da cura el Grischun – aschia era Flem – sedecidi da finir culla scola romontscha. Sistematically

mein han ins entschiet ad eliminar il lungatg vulgar. Ins resenteva il romontsch sco ballast pil turissem. En biars loghens havevan ins schizun scumandau da tschintschiar in soli plaid romontsch sin plaz-scola. L'economia verteva buca il lungatg vulgar.

Rheinschlucht vs. Ruinaulta

Oz creschi quella tendenza puspei, han ins udiu alla Paterlada. Oz vegn denton buca pli scumandau, sulettamei cussegliu. Ins dueigi esser consequents cun informaziuns turisticas. Quellas seigien cheu pils jasters, e buca pils indigens. Per quei seigi da scriver per tudestg ed engles. Alla Paterlada digl 1 d'uost han ins mo sdrimau la tematica dalla noziun «Ruinaulta» encunter «Die Rheinschlucht». Ruinaulta associeschien ils jasters dalla Tiaratudestga cun enzatgei negativ, vegn ei argumentau e getg che la noziun «Rheinschlucht» seigi bia pli transparenta. „Il plaid 'Viamala' han ins era buca remplazzau cun 'Gefährlicher Weg', ha zatgi remarcau.

La reclama turistica ei buca stada la suletta tematica alla Paterlada. Participontas e participonts han «paterlau» dalla cultura, digl Uaul Grond, nua che la Surselva entscheivi, da historias da famiglias da Flem, dallas soras Casty che menavan la pensiun Waldegg, dalla Casa Melna e sias exposiziuns. Forsa detti ei zacu la pusseivladad d'organisar leu zatgei tiel tema dil romontsch. Daco buca? Alla Paterlada han ins era tschintschau dallas relaziuns denter Trin e Flem, lu era denter Flem e Laax. Falera e Flem harmonisavi meglier, ha enzatgei saviu gir. Igl ei stau ina sentupada intima senza truscha e colonnas. La CRF vul cuntinuar cun quella purschida.